

Home > CHASTELAIN DE COUCI > EDIZIONE > Quant voi venir le bel tanz et la flour > Edizioni > Hubbard Nelson

Hubbard Nelson

I.

Quant voi venir le beau tans et la flour,
ke l'erbe vert resplent aval la pree,
lors me sosvient d'une doce dolor
et del douc lieu ou mes cuers tent et bee.
s'ai tant de joie et s'ai tant de docour
ke je partir n'em porroie a nul jour.
Et quant je plus sui loins de sa contree,
tant est mes cuers plus pres et ma pensee.

II.

Voir, il n'est riens dont je soie en tristor
quant moi sovient de la tres belle nee.
et si quic bien ke je fas grant folour
quant maintes fois l'avrai dure trovee,
mais beax samblans me remet en vigour.
S'emploierai molt bien la grant amor,
dont je l'ai tant dedens mon cuer amee,
se loiautes mi doit avoir duree.

III.

Diex! tant mar vi ses vairs iex et son vis
par quoi mes cuers est mis ens l'acointance.
cou est la riens dont je sui plus espris.
Se devers li ne vient ma delivrance,
docement sui engignies et sospris,
car s'ele velt, docement serai pris.
Nel di pour cou k'en soie en repentance
ne Diex voloir ne m'en doinst ne poissance.

IV.

Dame, merchi, se jou sui fins amis;
n'esproves pas sor moi vostre vengeance,
car vostres sui et serai a tous dis.
N'en requerrai por mal ne por grevance,
et se je sui de vostre amor espris,
douce dame, ne m'en doit estre pis;
et se por vous ai et paine et pesance,
ne me doit pas trop torner a grevance.

V.

Beaus Sire Diex, coment porrai avoir

vraie merchi ke tant avrai requise?
ja nel deust ne soffrir ne vouloir,
la douce riens ki tant est bien aprise,
puis k'ele m'a del tout a son vouloir.
Ke me fesist si longement doloir?
s'ele seust com s'amors me justice,
ja ne fausist pities ne l'en fust prise.

- letto 345 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/hubbard-nelson>